

35 Jahr tuen ich scho mini Värslü ufsäge
und 35 Jahr tuen ich dezue mini Chomeini Maske träge
und wer das als kulturelli aaeignig gseht jo dem antworti nome
esches denn gschieder weni s`nächsti Jahr als Freyheitstrychler chome

De Roger Federer het sin Rücktritt geh de Dario Cologna au
und jetzt seit au no de Beat Feuz nach de Renne in Kitzbühel tschau
nur ein Sportler gets be eus er Schwyz de ignoriert das Ganze
de Simon Ammann de springt secher no mit em Rolator über d`Schanze

Also liebi Lüt vo de Sp Schwyz wenn er scho gen*dere müend
den verlange mer das er das au konsequänt awände tüend
und eus be de nächste Bundesrotswahl hoch und heilig chönd garantiere
das denne näb de Fraue au Manne und Es dörfed kandidiere

Wie mer d` Schwyz e de Zuekonft met Strom versorgt wörde mer gärn erfahre
doch s`èinzig wo die z`Bärn uselönd esch das mer Strom söll spaare
jo fällt den dene nüt Bessers ie jo send den die ned klüger
aso die send öpe glich planlos underwägs wie de Berset mit sim Flüger
und de Clou 2 Tag bevor de Berset denn z`Frankrich het müesse lande
esch die Story vo sim Ufo scho em Bleck en gstande

E de Region Schinznach Bad Birrfäld händ teil Lüt en riese Wuet
well mer dete us versehe es paar Stei zertrümmere tuet
mached doch kei Gschiess wäg dem Geowäg und düend en es Uebergwändli schlüffe
en Lastwage neh und ed Bärge fahre det lege so Stei a de Hüüfe

Im Städtli Brugg do sölls scho gli Bänkli zum hocke geh
nor e de Altstadt wo fasch alles schloft do wette si öpis meh
det hätte si nämlech lieber Näschter das sig ehres Ziel
übrigens en Sponsor heige si scho Grüezi Min Name esch Fischer vo de Fischer Bettwarefabrik Au Wädswil

Z`Rinike gets Lüt die händ keis Problem wenn de Bus of de Stross mues halte
und denn gets au no die Andere wod Busbochte wettet bhalte
und wemmer die Buchte ned stoh loh tüegi drohed eus die Säbe
da si derte os Protescht ehri Händ uf d`Stross ue chläbe
und wen das denn noni längt würde si eus garantiere
dass si vo de Oberdorfstross die 2 Pföste umplatziere

Sid de letschte Gmeirotswahle es weisses jedes Chend
dass be eusere Riniker Regierig d`Fraue i de Mehrzahl send
heno jetzt esch es halt eso das schläckt kei Geiss ewäg
esch äch das de Grund wiso sech jetzt be eus d`SVP ufglöst hät

Liebe Gmeirot die Umfrog über eusi Zuekunft mer hätte fasch Freud dra gha
nur händ det leider d`Fäldli gfehlt womer achrüzele cha
drumm düend doch bitte s`nächsti mol das mers au alli tschegge
zu dem Frogeboge eifach no en Lottozeddel bielegge

Wenn euse Volg den einisch züglet het met all sine 7 Sache
jo denn wörd ich den am alte Ort en Antiquitätelade mache
und wen mer den ganz aständig frogt darfsch d`Hoffnig nie verlüre
den wörd jo velech de Bsetzer vom Hersche sin Grümpel au bistüre

S`letscht mol hämmer de Hayro no kritisieret well er kei Serviertochter het
und e de Zwüschezyt het er eini wo niemmer me misse wet
jo met der Andreea tuets er Tannegg em Service so richtig fäge
ändli hämmer wede emol en Wirt wo macht was mer em tuet säge

*Der Komedi*²³

Wänd er me bsueche? Ich be dehei onder „www.komedi.ch“

Zugabervers 1

40 Jahr scho gets d'Opus-C-Voll 15 Jahr di Senile
und wie gseit au ich tu scho 35 Jahr a mine Värslī file
und well mer au scho über 20 Jahr be de Erna dörfe d'Helge zeichne
wette mer si höt Zobe do met emme Gschänk uszeichne

Zugabervers 2

Du Du Du Du Du Du Du Du Du Du Du Du Du
Du Du Du Du Du Du Du Du oder vech Du
Du Du Du Du Du Du Du ich sägs jetzt do ohni z`prahle
nach 35 Jahr esch eus schiesegal wer eus eis duet zahle